

**■ GLOSSA**

# Uffants dal stadi

DA SILVIO CAMENISCH

**Q**uest bel uffant è uffant dal stadi, s'accor-scha la magistraglia dal stadi immediat. Già la mamma, sco quai ch'ella transporta il bel uffant, insisten-tamain e persistentamain, en taxi-mamma senza il bab a scola, di tut; na, betg tut, insatge di jau ussa tranter las lingias, e quai è d'acceptar. Quella mamma da la nova moda vegn da qua nà en outfit pli u main da Pussy Riot u da Femen a dar giù il bel uffant dal stadi a la magistraglia. So, dastga la magistraglia avair e giudair il bel uffant dal stadi fin la saira, cur ch'il di va da rendì ed ils Zillentaler Schürzenjäger pietus dechantan: Wenn die Arbeit getan, der Abendfriede beginnt...

**Q**uels èn mes uffants, Quels hai jau schendrà cùn mia dunna e na sai a nagin d'engrà. Mia dunna è stada a mai in bel er preparà: fatg zulk, arà, cuntschà, arpeggià e semnà, sun jau stà ad ella il grond semnader, ch'el vegn celebrà e beatifitgà, insistentamain e persistentamain d'experts. Mes bels uffants sumeglian mai, quels na sumeglian nagin auter grond semnader u pur supervern tschertga. Hai jau schendrà sut mes agen tetg, qua sun jau il retg, garanti betg il stadi da dretg e social, e quai è simplamain d'acceptar! Tge di il giurist federal emerità G.N. anc fitg activ? Quels uffants èn mes possess, na stoss jau betg dar nà al stadi! Duai



mo er semnar sez e la dunna.

**Q**uels bels uffants èn mes possess, sumeglian mai, surtut mes chau. Na stoss jau betg duman-dar, danunder ch'els derivan. Ins po vesair mes chau da partida e chau da mes amis da partida sin placats nairs suenter la via. Noss chau da partida mussan a nus la via e la vardad, insistentamain e persistentamain, e quai è simplamain d'acceptar. Sco chau da fracziun da nossa partida, la lavina nera da chau, chau, chau, na vi jau betg uffants dal stadi. Jau vi avair ed hai uffants da nossa paupra libertad e senza sclavaria. Jau hai num Marcus. Il chaun aggressiv (chaun da risico!) cun mai ed en mai dastg jau laschar or, fatsch jau ina spassegiada sociala tras mias columnas. Betg glossas.

**Q**ua di in, in chau pli grond che jau: Tge malengraziaivel stadi uffizial! Prenda da nus noss uffants, noss regalads dal char bun Dieu. Quels pau-

pers uffants dal stadi totalitar ston sbragir, ch'i rumpa a nus ils cors en praschuns, sprich canortas sut cundiziuns fitg miserablas! Il ferm film actual Les Misérables è vegnì filmà qua. Qua, nus avain fermes maletgs da las praschuns e sclavarias, quels mussan qua la vardad nagliur sfalsifitgada, nagliur bella.

**S**tuessan nus stuair dar giu noss chars uffants, noss regalads dal char bun Dieu, mintga damaun en praschuns tant statalas sco totalitaras: canortas, cun temps da bloc e maisas da la damaun, maisas da mezdi, maisas da la saira ed il pir anc uffants d'asilants enturn maisas da la damaun, da mezdi da la saira! na stuessan nus betg simplamain acceptar u tge di il chau dals chau? Impertinenz nunditga!, dal chantun sco dal stadi, qual ch'igl è stà.

**B**ah! Mes uffant qua è stà en mauns dal, è stà a mauns al stadi, tschuffun. Quest uffant na prend jau betg pli enavos!, di la mamma en ferm outfit (guarda sura) segund il ferm dictat da la moda. Quest na betg pli mes uffant dun jau nà. En ina clappa d'uffants dal stadi. Duai el esser ad el in bab, in sozial. Il bab biologic, il logic, il bab conusch gnanc jau. Savess esser stà quel da lavurdis, pudess er esser stà quel da dumengias u omadus. Ti vesas gea, la stadi-democrazia moderna lube-scha uschia, nossa «regio-crazia» interna na lubiss mai uschia!